

四庫全書

史部

欽定四庫全書

隆平集卷十一

宋 魯鞏 撰

樞密

夏竦字子喬江州人父承皓太平興國初上平晉策補  
右侍禁與北敵戰歿於河朔竦以父死事恩授潤州丹  
陽縣主簿景德四年舉賢良方正科入等仁宗封慶國  
公宰臣王旦薦竦才遂命教書資善堂累擢知制誥與

妻楊訟左遷天聖中復知制誥遷翰林學士又兼龍圖閣學士五年樞密副使七年叅知政事與宰相呂夷簡不協徙樞密副使明道二年罷為禮部尚書知潁州景祐三年為三司使元昊叛建節知永興軍徙涇州明年兼陝西安撫經略招討等使還判永興軍進宣徽南院使與陳執中共事不協徙鄜州又徙河中府慶曆二年以為樞密使諫官御史皆言竦姦邪在陝西怯於用兵今用之則邊將之志墮矣凡十八疏罷之本鎮言尚不

已乃改吏部尚書知亳州明年除資政殿大學士又明年復宣徽南院使河陽三城節度使判并州又明年加使相判大明府又明年召為宰相言者又以為常與宰臣陳執中不協不可共事乃改樞密使封英國公慶厯八年罷知河南府皇祐九年加侍中明堂恩移鎮武寧徐州大都督府長史改封鄭國公明年以疾求歸卒年六十七贈太師中書令初謚文正考功劉敞以為世謂竦姦邪謚文正未允公議改曰文莊子安期天聖三年

竦丁母憂以宰相王欽若素與厚善乃微服至京欽若  
主之遂復起居西掖所居多部中商販喜離間僚屬以  
鈞致其事雖待家人亦不以誠故時以姦邪目之慶厯  
末京師一日無雲而震者五上召翰林學士張方平謂  
曰夏竦姦邪天變如此宜草詔出之遂有河南之命竦  
少苦學六經諸史百氏陰陽律厯之書皆博洽亦善為  
文朝廷大典冊屢以屬之大中祥符間叅政丁謂請醜  
金水河作后土祠三司使林特欲治玉清昭應宮複道

發運使李溥欲致海上巨石為三神山於會靈觀池中  
羣臣爭言符瑞竦獨抗疏以為不可其後遂寢知洪州  
其俗信巫有疾輒屏去親屬飲食衣藥悉聽於神死者  
甚衆竦索部中得巫一千九百餘家毀其淫祀以聞朝  
廷詔江淮以南皆嚴禁絕知襄州歲饑發公廩募富人  
出粟常全活數萬人賜詔褒諭

王德用字元輔父超趙州人太宗尹京召隸幕下即位  
以隸御龍直累以戰功進擢淳化三年遂至河西軍節

度使殿前都虞候真宗即位加檢校太傅北敵入寇從  
幸大名府以傅潛逗撓命超帥鎮州又領真定高陽三  
路於遂城遇敵斬裨王騎將十五人俘馘二萬計手詔  
褒之咸平六年副帥王繼忠與契丹戰於望都縣而超  
不赴援繼忠遂陷敵景德初上駐蹕澶淵召超赴援又  
行頗緩敵遂深入會通和好止罷三路帥卒於青州年  
六十二贈侍中子德用德基德恭超為將善部分御下  
有恩與高瓊同典禁旅常因休沐過營壘軍校不將迎

瓊命筆之超曰若緣按習可懲其不肅今不宿戒何名責之人稱其恕至道二年遣將五路伐繼遷超將兵六萬趨援夏州德用從行為先鋒年纔十七部萬人戰鐵關斬獲甚衆進師烏白池他將失道敵勢頗銳超持重不進德用以精兵五千轉戰三日敵遂却乃領衆要其歸路距夏州五十里先據要害下令曰敢亂行者斬一軍肅然超亦為之按轡繼遷引避之以功授內殿崇班累擢至觀察使明道二年以檢校太保簽書樞密院事



是年改樞密副使景祐二年同知樞密院事實元元年  
加宣徽南院使二年罷以嘗令知府州折繼遷市馬為  
王恂所發初蘇紳言德用貌類藝祖宅枕乾岡上匿其  
疏既而孔道輔又以紳之言劾奏之降千牛衛上將軍  
知隨州慶厯二年復留後加節度使又復宣徽南院使  
進使相踰年以太子太師致仕復起判鄭州至和元年  
樞密使同平章事嘉祐元年請老以魯國公為景靈宮  
使卒年七十八贈太尉中書令諡武恭子咸熙咸融咸

度咸英咸康德用判澶州常逐敵使劉六符六符曰比  
歲大熟非仁政所及邪曰明天子在上豐年乃其常矣  
至和末富弼為相契丹使來命德用伴射敵使曰天子  
以公典樞密而用富公為相可謂得人矣上聞之賜德  
用御弓一矢五十

狄青字漢臣汾州人初為騎御馬小底後隸拱聖軍選  
為散直元昊叛擇青為延州指揮使前後二十五戰中  
流矢者八常破金湯城略宥州屠唃咻歲香毛奴尚羅

等族燔積聚數萬收族帳二千餘生口五千餘又城橋  
子谷築招安等堡寨以功遷至澶州刺史累擢加節鉞  
皇祐四年樞密副使以宣徽南院使宣撫荆湖南北經  
制廣南東西路盜賊五年平廣源州蠻儂智高還復樞  
密副使是年陞樞密使嘉祐元年以言者謂青家數有  
光怪罷為使相河中尹知陳州髡發疽卒年五十贈中  
書令謚武襄子諒諂詠諫諛說初韓琦范仲淹經略陝  
西見青皆器遇之尹洙亦謂青有良將才青慎密寡言

其計事必審中機會而後發行師正部伍明賞罰雖敵在前士卒無敢後先者故所向必有成功仁宗聞其在陝西數戰勝欲召見問其方略適敵寇平涼止命圖形以進久之方大用而智高起廣源州破邕及沿江九州上憂顧左右未有可屬者青上表請行明日賜對且言臣起行伍非戰伐無以報國願得蕃落騎兵數百益以禁卒當羈賊首致闕下上壯其言遂授以將鉞宴垂拱殿遣之先命孫沔余靖為安撫使討賊未克故又用青

青至合河靖三將兵次賓州召廣西路兵馬鈴轄陳曙  
按其金城驛遇賊不戰之罪及殿直袁用等三十一人  
悉戮之軍士震恐遂下令止具十日糧明日絕崑崙關  
出歸仁鋪先布陣成列而賊以覘者之誤來獨後遂失  
險乃悉衆逆戰前鋒孫節戰死山下而賊勢方銳青躬執  
白旗麾騎兵進縱左右翼出其意外賊衆大潰斬首二  
千二百級獲偽官五十七人智高夜縱火焚城而遁詰  
朝青入按城中獲金帛鉅萬馬牛數千築京觀城之北

隅招復俘脅者七千二百使還其家初所獲有衣績金龍者衆謂為智高青曰安知非詐寧失智高朝廷不可誣也後智高果不死人服其詳慎尹洙以貶死青懷知已常調恤其家

高若訥字敏之并州人十歲喪父寓家衛州因居馬天聖二年登進士第累擢天章閣待制權御史中丞慶曆七年樞密副使皇祐元年叅知政事三年樞密使五年罷除觀文殿學士兼翰林侍讀學士同羣牧制置使判

都省卒年五十九贈右僕射謚文莊御篆其碑額曰儒  
賢之碑有文集二十卷子彥輔保衡安石吉甫元規若  
訥苦學強記古今傳記莫不徧閱於申韓管子之書尤  
其所好亦習醫書雖國醫相與評論必為所困然拘古  
方書以升量湯劑多過而用性溫平藥治疾少効特以  
博覽強辨取勝耳皇祐間累詔參定尺以制鍾律論久  
不決若訥以漢貨泉度一寸依隋書定尺十五鍾上之  
初若訥知棣州商河縣縣多窪田舊令或假民工種以

治之若訥獨棄而不耕知諫院時范仲淹論呂夷簡過  
失貶知睦州余靖尹洙亦繼被黜歐陽修移書責若訥  
阿附宰相而不言若訥忿而繳奏其書修謫夷陵令而  
若訥遂為時論所鄙權御史中丞宰相賈昌朝與叅知  
政事吳育數爭事上前明年春早上詢所以若訥遂引  
洪範以謂大臣不肅而雨不時若昌朝育因是俱罷若  
訥即大用公議亦短之惟盜起甘陵議者多欲招降獨  
若訥言河朔重兵所聚若釋不討後且啓亂為夷狄笑



於是始議定人以為當

田况字元均其先京兆人後徙居信都石晉之亂祖行周陷北敵景德初敵復內寇以所略數百人屬其父延昭悉縱之因亦遁歸累官至率府况初舉進士賜同學究出身不就天聖八年登進士第又舉賢良方正科入等累擢知制誥龍圖閣直學士龍圖閣學士翰林學士兩為三司使至和元年樞密副使嘉祐三年樞密使四年以疾免除尚書左丞觀文殿學士以太子少傅致仕

卒年五十九贈太子太保無子以弟之子至安為後初  
况從夏竦辟為陝西經略判官叅都總管諸將悉兵擊  
賊况極言其不可乃止又言所以給邊者十四事多見  
聽用在三司約景德會計錄以今財賦所入多於景德  
而其出又多於所入著為皇祐會計錄上之冀以悟上  
庶更立經制使民充實而縣官有餘用焉况之為人寬  
厚明敏與人若無不可而非義不可干也於天下事小  
利近功則置而不論所及必朝廷先務而可以利民者

有奏議三卷著好名朋黨二論常知成都府自李順王均之亂蜀守皆得便宜從事雖或小罪并其家內徙流離道路失所者頗衆况察其非有甚惡釋之又聽斷之明蜀人以比張詠

包拯字希仁廬州人天聖五年登進士第累擢天章閣待制龍圖閣直學士權三司使嘉祐六年遷給事中正三司使數日拜樞密使遷侍郎辭不受七年薨於位年六十四贈禮部尚書諡孝肅子紘初拯以大理評事知

建昌縣辭以親年高改和州管庫而親不欲去鄉里遂  
解官就養及親亡廬墓側終喪不忍仕久之知揚州天  
長縣有訴盜割牛舌者拯曰第殺而鬻之俄有告私屠  
牛拯曰已割其舌矣非私殺也盜色變遂引伏嘗使北  
敵敵典客曰雄州開便門欲誘納叛人刺候疆事邪拯  
曰誠欲刺之自有正門何必便門也此豈嘗問涿州門  
邪敵有沮色為御史言諸道轉運加按察使之名以苛  
察相尚奏劾官吏更倍於前皆捃撫細故使吏不自安

詔為罷之除陝西轉運使既行數日有他路監司對而求章服者上不悅因傳宣中書曰包拯使陝西未嘗自言也可齋三品服賜之及知諫院數論斥大臣請罷一切內降又錄唐魏鄭公三疏請置座右及別條七事言明慎聽納辨別朋黨愛惜人才不主先入之說蕩去疑法條責臣下牽錄微過其論甚美在陝西奏罷斜谷務造船材木十萬及罷七州河椿竹索數十萬奉使河北言牧馬占邢洺趙三州沃壤萬五千頃悉請以予民從

之知瀛州除放一路所負回易公使錢十餘萬仍奏諸州毋得回易公使錢遂為著令開封舊制訟牒令知牌司收之於門外拯知府開門使徑至庭下辨曲直京師大水拯以勢家多置園第惠民河上歲久堙塞遂盡毀去宦者偽增地契步數悉奏劾之權貴為之斂迹權中執法請立皇嗣陳教養宗室之法責諸路監司聽御史府自舉屬官諫官御史不避二府薦舉兩制得至執政私第減一歲休暇日皆施行及攻罷張方平三司使而

除宋祁拯又屢擊祁在蜀宴飲過度遂除拯三司使翰林學士歐陽修疏拯所奪蹊田之牛罰已重矣又貪其富不亦甚乎拯居家避命者久之在三司和市上供物以革科率之擾其為人不苟合未常偽辭色以悅人平居無私書故人親黨亦皆絕之人多憚其方嚴雖里巷婦人穉子莫不知其名仕至通顯奉已儉約如布衣時少為劉筠所知筠無子為奏其族子為後而請還其所

沒田廬

孫沔字元規越州人天禧三年登進士第累擢天章閣待制龍圖閣直學士樞密直學士皇祐五年樞密副使至和元年罷為資政殿學士知杭州加大學士徙青州又進觀文殿學士移并州諫官御史吳及沈超彈奏沔在杭并不法事移壽州按實如奏責寧國軍節度副使復光祿卿分司南京會恩除知濠州以禮部侍郎致仕英宗即位起為資政殿學士知河中府又復觀文殿學士知慶州徙延州卒年七十二沔為吏有才力在言職



以直稱知慶州三司所給特支物惡而估直高軍人有語而優戲及之沔曰妄言搖衆驅出命斬之諸將為請猶杖配嶺南明日散特支羣情帖然自明州徙秦州仁宗勉以邊事對曰秦州不足留聖慮陛下當以南方為憂明日報蔣偕陷賊上謂輔臣曰南事如孫沔所料遂以屬之在杭并淫資貪暴杭州黜配人以百數及徙青州皆竊其文案以行而訴者無以自解慶厯初監司稱寬弛故加轉運司按察之名自是雖將相大臣出守方

郡者不免窘辱遂罷去按察稍抑其權而嘗厯要官者  
輒復輕肆及沔之罷監司皆坐黜未幾真定呂溱復以  
罪廢而居方面者始不敢慢法守焉

### 宣徽使

咎居潤字廣川魏郡高唐人少有氣節常為後唐樞密  
院小吏景延廣留守西洛補為右職契丹犯闕以兵圍  
延廣家故吏悉避去特居潤力為全護時論多之仕周  
至宣徽南院使建隆初仍舊職是年除義成軍節度使

檢校太尉卒年五十九贈太師

張美字玄生清河人少為三司小吏周世宗建節鎮寧  
美掌郡財賦即位累擢左領軍衛大將軍三司使久之  
除宣徽南院使仍領三司使李筠鎮上黨美度其必叛  
潛於懷孟多積芻粟建隆初美亦以宣徽使居三司如  
故李筠叛太祖親征糧運有備美有力焉以功除寧國  
軍節度使鎮同州五代以來官給錢民間長吏十取其  
一謂之率分錢美至同州官市木美不受率分錢宋興

始革其弊諸郡尚或未悛既而有訴其事者皆坐責而美獨免太宗朝授美環衛官因求致仕卒

潘美字仲洵魏郡人少儻常謂其里人王密曰漢代將終兇臣肆虐四海有改卜之志大丈夫不於此時立功名取富貴與萬物共盡可惜也仕周至客省使太祖與美素相厚受禪命諭旨中外陝帥袁彥兇悍上懼其有變詔美監其軍俾圖之美至諭以天命彥遂入朝上言潘美不殺袁彥而彥朝覲成我志矣上親征李重進

以美為揚州巡檢錄功除團練使湖南既平授美潭州防禦使劉錕數侵湖湘美擊走之溪峒蠻獠自唐以來為居民患美亦討平開寶三年命美征嶺南以尹崇珂副之由賀州進兵相繼破賊數十萬衆俘斬不可勝計遂擒錕至闕下又平樂範等所據容韶五州之地嶺表遂安詔與崇珂同知廣州七年冬詔與曹彬率師伐江南江南平九年除宣徽北院使太宗即位改南院太平興國四年親征劉繼元降因命美鎮太原三交西北三

百里地號故軍最險阻戎人之咽喉也美帥師襲之虜  
衆遂遁美安撫至代郡適戎人萬數攻近塞美誓衆街  
枚大破之俘獲甚衆雍熙三年詔與曹彬崔彥進傅潛  
等北伐美獨拔寰朔雲應四州有旨護其民內徙敵復  
至楊繼業戰歿於陳家谷口詔削三官四年復舊未幾  
加太師又兼同平章事封韓國公卒年六十七贈中書  
令謚武惠

郭守文字國華太原人父暉戰歿守文方十四歲哀毀

過人周擢為東班副使開寶中從潘美征嶺南又從曹彬拔金陵彬遣護李煜赴闕煜無生意守文語之曰國家止希漢武之開疆豈責防風之後至也煜遂釋然守文以戰功累擢至武州團練使雍熙四年除宣徽北院使端拱元年出為鎮州路都帥加南院二年卒年五十五武夫悍卒皆為流涕守文善撫士卒所得俸祿悉以宴犒死之日家無餘資先是諸將邀功生事自岐溝君子館之敗朝廷患之以守文知書而沈毅有謀故自近

臣付以邊任上聞其卒深所嗟惜

雷有終字道成工部侍郎德驥之子以父任授官初任  
兗州萊蕪縣尉發知監劉琪姦賊即代其任遂累加進  
擢李順之亂為荆湖夔峽轉運使至廣安軍夜遇賊衆  
圍既合有終引竒兵從後擊之赴水火死者不可勝計  
久之除諫議大夫知成都府次簡州寓佛舍度賊之至  
命左右重閉土人嚴更備初夕間道而去賊果圍寺牆  
壞止得擊柝者咸平二年王均叛除觀察使復知成都



府既至而均偽開城若將遁有終及上官正石普徑馳入賊閉關伏發僅墜堞而免乃築壘城北焚城樓均始遁石普楊懷忠襲至富順監獲之蜀平遷留後景德二年擢宣徽北院使卒贈侍中有終險側喜攻人過失有吏幹善撫士卒

李用和字審禮章懿皇后之母弟也少困窮劉美得之於民間奏以為三班奉職章懿薨特除禮賓副使累擢節度使殿前副都指揮使以老乞罷軍職除宣徽北院

使慶厯五年改南院加使相進檢校太尉兼侍中卒年六十二贈太師中書令追封隴西郡王子珣璋琚琦瑛瑒瑛球玘瑋尚福康公主用和起民間以帝舅位將相小心避權勢公使錢正任以上許私用而用和悉以為軍費不入其家

郭承祐字天錫開封人娶華王元偁女永定郡主授供奉官累擢至建武軍節度使皇祐元年除宣徽南院使同羣牧制置使出判應天府徙亳州諫官御史劾奏承

祐在應天府擅批宣頭留上供糧米及擬翰林所使用  
罷出入狂僭落宣徽使卒年五十九贈太尉謚曰密子  
士遜士選士逸士達士達承祐驕侈狡獪所至多興作  
為煩擾又好言事指切人過失時謂之武諫官判許州  
蘇舜元為轉運使薦其有將帥才其政如龔黃上謂大  
臣曰承祐庸人而外臺薦之如此何所取信哉

張堯佐字希元河南人溫成皇后之從父也天禧三年  
登進士第累擢天章閣待制權知開封府加龍圖閣待

制直學士權三司使遷禮部侍郎正除三司使諫官御史言堯佐主大計諸路困於誅求內帑疲於借助上方祀明堂召問經費如何對曰事已辦矣賜詔褒諭皇祐二年除淮康節度使羣牧制置使宣徽南院使景靈宮使御史中丞王舉正諫官吳奎等彈奏恩寵太過以至留百官班廷議遂罷宣徽及景靈宮使三年復以為宣徽南院使徙天平節制卒年七十二贈太師子吉甫山甫申甫寇甫正甫隱甫師甫元甫儀甫堯佐憑戚里以

進無可稱者

隆平集卷十一

欽定四庫全書

隆平集卷十二

宋 曾鞏 撰

王後

周鄭王名訓世宗長子顯德六年六月封梁王世宗崩  
即皇帝位明年正月六軍擁戴太祖而王遜居西邸封  
國於鄭建隆三年王徙房陵開寶六年薨年二十一知  
制誥張澹請諡曰恭皇帝陵曰順陵周自辛亥歲建國

至己亥而禪位三主共九年

偽國

吳越錢俶字文德名上字犯宣祖廟諱故止稱下一字  
祖鏐曰吳越武肅王父瓘曰文穆瓘卒子佐繼佐卒以  
弟侖繼侖為牙校胡進思所廢俶時鎮浙東遂渡江襲  
偽位漢授以東南面兵馬都元帥領鎮東軍節制封吳  
越國王至周以天下都元帥處之宋興改大元帥開寶  
八年征江南為招撫使江南平與其妻子來朝待以優

禮賜劍履上殿詔書不名封其妻孫氏為妃宰臣言自古異姓諸侯王妻無封妃之制太祖曰行自我朝何拘舊典太平興國三年四月復來朝而陳洪進繼至洪進先納土倣不自安亦上章以國歸有司改封淮海國王子惟濬惟治並除節制諸子弟族人及其將佐或收守有差錢氏五主共八十一年倣以天下既平八年求去元帥之稱從之雍熙間改封漢南南陽二國既又辭國號改封許徙鄧倣唐天成四年八月二十四日生端拱元



年八月二十四日薨年六十進封秦國王諡忠懿為太師中書令者四十年任元帥者三十年近世處富貴者未有其比倣崇信釋教性謹未常忤物

子惟演字希聖倣第十四子也幼有俊才倣常使賦遠山詩有高為天一柱秀作海三峯之句倣深器之初補職牙門累遷左神武將軍咸平中獻文召試學士院上覽所試稱善特授太僕少卿累擢知制誥翰林學士坐為人於開封府請求奪職久之復學士天禧四年為樞

密副使仁宗即位除樞密使太后誦制宰臣馮拯以惟  
演太后姻家請出之除節度使知河陽請覲加使相判  
許州屢徙藩鎮鬱鬱不得志及耕籍田求侍祠留為景  
靈宮使太后崩還河陽請以章獻太后章懿太后同配  
食真宗廟御史中丞范諷劾奏惟演擅議宗廟落平章  
事改鎮崇信卒年五十八特贈侍中惟演少富貴能志  
於學有文章與楊億劉筠齊名常曰學士備顧問不可  
不該博故其家聚書侷於祕府又多藏古書畫在館閣

金之...  
卷十二  
預修策府元龜凡千篇特詔與楊億分為之序其為人  
少誠信初附丁謂力排準其後遂謂亦與有力焉所著  
有典懿集二十卷樞庭擁旄前後集伊川漢上集金坡  
遺事錄飛白書序錄逢辰錄奉藩書事子暖晦昕昉曦  
昞曄曠眈喚曜

漳泉陳洪進字濟川其先泗州人曾祖為閩官遭亂因  
家泉州仙遊縣唐光啓中賊帥王潮陷泉州以福州觀  
察使王審知為副潮卒審知據其位梁冊審知為閩王

二十九年而卒其子延翰繼踰年而被弒其弟延鈞襲  
八年遂僭帝號十一年卒子昶嗣被逐而叔延義立以  
其弟延政為建州刺史既而背命僭號商國六年閣門  
使連重遇推客省使朱文進以奪其位復號閩國時石  
晉天福七年也文進以黃紹頗為泉州刺史程贇漳州  
刺史許文稹汀州刺史泉人念王氏為羣逆分據穴員  
指揮使留從劾王忠順董思安以氣義相附謀復王氏於  
是募敢死士五十人而洪進與焉夜擒紹頗害之立延

政從子繼勲而從劾忠順思安為統帥洪進為指揮使  
繼勲欲送紹頗首於建州奉延政為主而道阻賊盛莫  
敢往者獨洪進請行道遇賊語以泉福已定賊遂潰洪  
進至建州延政大悅既而程贇立延政從子繼成許文  
稹又以汀州降而朱文進為連重遇所殺福人亦殺重  
遇延政遂遣洪進還泉州三年江南李景陷建州以延  
政入金陵明年留從劾劫繼勲使降江南自領州事李  
景授從劾泉州刺史進節制以洪進佐之進職統軍使

建隆三年從劾死洪進誣其子紹鎡將叛執送建康推副使張漢思為留後自為副使漢思患其專將圖之洪進一日袖大鎖鎖其府門叩門謂漢思曰軍吏請洪進知郡衆不可違速以郡印見授漢思惶懼亟與之得印復謂軍士曰漢思昏老不能治郡以印付吾將吏皆賀即置漢思別館遣使告江南而李煜遂授以節制太祖既平諸路洪進乃請命於朝李煜屢奏以為不可詔不從遂別授以節制太平興國三年來朝即以國歸朝廷

金史卷一百一十一  
卷十二  
改除節制杞國公授其子文顯團練使文顯文頊並刺  
史久之進封洪進岐國公卒贈中書令諡忠順

南唐李煜字重光其祖昇偽吳將徐溫之養子冒徐姓  
名知誥後唐長興中專吳政為太尉以子景為平章事  
昇天福間遂僭稱帝國號齊復李姓因改為唐都金陵  
七年而死景嗣以宋齊丘周宗為相僭郊祀禮遣將校  
侵福建漳泉之地河中李守政叛永授而景應之聞其  
敗乃還周初下長沙復失之方中原多事盧文正李金

全皇甫暉之徒南奔景據江淮三十年國力富盛潛有  
窺神器之意聞世宗克揚州始懼而盡割淮南地歲餘  
盡去僭號既而忿躁乃殺宋齊丘陳覺李正古及太祖  
登位益懼遂徙都南昌景死煜嗣表請追尊景立帝號  
太祖許之廟號元宗及陵名亦稟而後定自是朝廷始  
改書為詔制西蜀嶺南雖平而江南貢奉不絕故未欲  
加兵乃遣使諭令入朝煜稱疾而訟江繕兵備始命曹  
彬潘美征之初樊若冰獻采石磯浮梁計上從之煜語



張洵曰古來有之煜曰兒戲耳橋成王師薄城而煜不知也時煜以兵柄任皇甫繼勳以機事屬陳喬張洵傳詔內殿者徐元瑀徐元瑜刁衍邊書告急元瑜等皆匿而不道及兵圍城煜驚且怒而殺繼勳焉陳喬張洵常相謂當死社稷及城陷喬獨死之洵從煜歸朝後至執政喬字子喬豫章人煜以為門下侍郎兼樞密使煜所遣拒王師皆非習武事者其將帥多佩符印人傳以為笑及戰皆不復還城垂陷太祖猶遣諭曹彬令招撫之煜惑左右之

言卒至就擒開寶九年至闕免宣露布特授左千牛衛  
上將軍封違命侯太宗即位加特進改封隴西郡公卒  
年四十二追封吳王自昇至煜三主共三十九年而失  
國子仲寓官至刺史寓之子正言

北漢劉繼元其母劉崇之女適薛氏生繼元及其兄繼  
恩劉崇漢祖之母弟也為太原尹隱帝遇害漢太后遣  
馮道迎崇之子贇於徐州欲使襲漢位少尹李驥語崇  
曰觀郭公用心當自取之不若以兵至孟津觀變俟徐

州踐祚則無可疑矣崇怒以為驥欲離間父子并其妻殺之且表其事而周祖已登位崇遣人乞贖歸藩始知贖死矣乃為驥立廟遂僭帝號重幣結契丹如晉祖約為父子契丹策崇為大漢神武皇帝崇死子鈞繼鈞結李景孟袒為助仍求援於李筠初漢祖以鈞無子命育繼恩為嗣鈞卒繼恩襲而為侯霸榮先所殺郭無為遂援立繼元太祖常遣詔諭繼元無為各許以節制繼元因疑無為而無為復勸使効順又欲叱兵出戰及王師

注水其城遂殺無為以狗無為棣州人博學有詞辨初  
隱武當山為道士釣以諫議大夫起之太平興國四年  
太宗親征不欲屠城城垂破繼元始降自崇僭號繼元  
失國凡二十九年繼元殘忍臣下多被族誅未敗時太宗  
先命郭進斷契丹之援於石嶺關進至敵衆果來進擊走  
之繼元猶以蠟丸帛書求救於敵進得之以狗城下及降  
上宥其罪授右衛上將軍檢校太師彭城郡公賜第京  
師歲時霑賜甚厚又以房州為保康軍授繼元節制卒

贈彭城郡王遺奏以六歲子三猪為託上哀之厚卹其家  
西蜀孟昶其先太原人父知祥尚唐莊宗妹莊宗遣郭  
崇韜魏王繼岌平王行以知祥為成都尹充節度副使  
莊宗及禍明宗為送公主并二子入蜀安重誨用事以  
李嚴為西川監軍使圖之知祥遂殺嚴而結東川帥董  
璋婚媾謀據劍南既而明宗誅璋之家遣使諭之知祥  
伐蜀出於安重誨重誨既伏誅知祥乃上章謝罪璋疑  
其貳遂以兵襲知祥璋敗知祥表其事朝廷即付以兩

川封為蜀王許行墨制明宗崩即僭號盡得王氏故地  
知祥卒昶繼立建隆末昶潛結太原劉鈞為援謀起兵  
乾德二年十一月詔以昶與河東劉鈞蠟丸帛書將起  
兵故遣王全斌崔彥進王仁贍曹彬等分路伐蜀所至  
皆克三年正月十三日全斌次魏城昶上表請降自出  
師六十六日而兩川平計知祥割據至昶失國凡三十二  
年晉末光德亂華中原多事昶負固西南驕縱滋甚聞  
世宗來秦鳳始有懼意寓書世宗講鄉里之好世宗怒

不答愈不自安多積芻粟以鐵為錢禁民私用鐵而自  
鬻器用以專利民甚苦之以其子元喆為太子王昭遠  
伊審徵韓保正趙崇韜分掌兵柄其母謂昶曰吾見莊  
宗及汝父時非有功者不使主兵故人皆畏服樂為之  
用昭遠微賤特汝初學時給事左右而其餘皆世祿子  
驟置人上其誰敢言以吾料之惟高彥疇汝父舊人當  
不誤爾昶不聽其後高彥疇以夔州不守遂死之他悉  
為降虜昶至闕持授開府儀同三司檢校太師兼中書

令秦國公卒年四十七追封楚王昶死其母不哭子元  
喆除節度使元珪右千牛衛上將軍弟仁贄仁祐仁操  
並環衛官初王師將及境昶遣元喆率師守劍門自成都  
攜妓樂嬉戲而行聞劍門已破遂遁歸昶遠成都人少  
貧為僧童知祥因飯僧昶遠從至知祥見而留以給事  
昶昶立擢知樞密院兼節度使王師入境昶命總兵拒  
戰昶遠攘臂曰是行也豈止克敵當定中原矣執鐵如意  
指揮軍事自比諸葛亮及敗昶遠竄匿東川民舍猶



誦羅隱運失英雄不自由之句遂為追兵所執人皆笑之歸朝至節度使卒昶之宰相李昊在王衍時為翰林學士常草行降表及歸朝授工部尚書

荆南高繼冲曾祖季興渤海裔人唐末荆南司馬張環逐其節度使陳儒自稱留後環敗而季興守荆南梁開平初遂據有其地封秦王卒諡武信子從誨後唐天成三年襲偽位封南平王卒諡文獻子保融漢乾祐五年襲封平王卒諡正懿無子建隆元年其弟保勗嗣立從

誨於諸子中最愛保勗雖甚怒見之則釋然荆南人目  
之為萬事休建隆四年保勗卒子繼冲正月襲位二月  
王師援湖南道出荆南繼冲請舉族歸朝自季興至繼  
冲五主凡五十七年而失國乾德三年改授繼冲徐州  
大都督長史武寧軍節度使封渤海郡侯鎮彭門僅十  
年卒年三十二贈侍中繼冲久以國歸朝廷其祕書監  
孫光憲因王師至荆南而以理論之俾獻三州之地光  
憲有學術歸朝特授黃州刺史

南漢劉鋹五世祖仁安唐潮州刺史其子孫因家嶺南  
宰相韋宙以其兄之女妻仁安之子謙謙生隱謙仕至  
封州刺史昭宗時以嗣薛王知柔鎮廣州表隱為司馬  
委以兵柄宰相徐彥若卒遺奏請除隱留後隱厚賂梁  
祖求為郎除南海節度使梁祖開平初封隱南平王隱  
卒弟陟襲偽位時邕州葉廣略容州龐巨源交州曲承  
美皆自擅兵賦而陟并之遂盡有嶺表之地聞錢鏐封  
吳越王正明中陟遂僭稱帝國號大漢改元乾亨更名

巖又更龔龔之字無所出龔性酷暴行炮烙剝剔截舌  
灌鼻之刑為玉堂珠殿飾以金碧翠羽見北人必自言  
世居咸秦恥為南蠻主呼中朝止曰洛州刺史龔卒子  
玠為弟晟所弑而晟自立造鑊湯鐵牀聞湖南馬氏兄  
弟之隙遂遣兵取桂林柳賀之地晟卒子銀嗣銀委政  
闈宦後宮亦令冠帶預政其臣有小過或將大用則加  
以宮刑及將至敗也星多北流知星者以為北歸之祥  
初龔命曰者筮國祚遇復之豐曰將五十五年乎自梁

正明三年龔僭號開寶四年銀國亡其數無差又龔先  
名龔有術者筮曰後必有此姓者敗國事及銀用龔澄  
樞李托皆為內太師薛崇譽開府儀同三司銀以托二  
女為貴妃美人澄樞為銀置酷法之具因以敗國銀至  
闕宣露布訖命盧多遜詰銀翻覆之由銀對曰臣年十  
六而僭位龔澄樞等皆先臣舊人臣不得專遂命戮澄  
樞托崇譽於千秋門外而釋銀罪授右千牛衛上將軍  
封恩赦侯卒年三十九贈太師追封南越王銀口辯性

巧常以珍珠結戲龍於鞍勒以獻尚方工伎莫不駭伏  
太祖歎曰銀至京師猶規什一之利移此心計治其國  
豈至滅亡耶銀在偽邦於海門鎮募採珠卒二千號媚  
川都以石鎚足而下有及五百餘尺而後得珠則引綆  
而出氣不屬且死者不可勝計所積盈府庫而其求無  
厭及敗悉以焚棄潘美猶於煨燼中得其餘以獻之朝  
廷於是太祖詔廢媚川都仍禁民間不得以採珠為業  
湖南周行逢朗州人少亡賴犯法隸軍籍久之為裨校

唐乾寧初馬霸圖盜據湖南地自置郡守以下官廣順  
初馬希萼與弟希廣爭國率蠻軍殺希廣而自立又為  
其將陸孟俊所遷而立弟希崇因求援江南李景遣邊  
鎬赴之馬氏舉族俘於建康景以鎬帥潭而朗州軍亂  
推牙將劉言為帥以行逢為都校因上章李景求旌鉞  
不許言遂遣行逢帥舟師陷潭州邊鎬遁去因據其城  
言請移潭治朗周祖即言帥朗以王進逵帥潭顯德中  
裨將潘叔嗣害進逵請行逢帥朗行逢至戮叔嗣以徇

世宗因除行逢朗州大都督武平軍節度使兼侍中自  
是盡有湖南地建隆初加中書令行逢善用人盡心民  
政其壻求補吏以耒耜與之人服其公性多猜忌喜殺  
戮將終謂將校曰吾死張文表必叛公等強勉護吾兒  
既而文表果舉兵滅周氏其子保權年十一乞師朝廷  
詔慕容延釗李處耘率師赴之而保權已平文表王師  
始至遂嬰城以拒城破竄匿民間太祖以其年幼政不  
由己詔尋訪赴闕保權上章待罪釋之授右千牛衛上



將軍累遷至左羽林統軍卒

錢倣所獻州十三縣八十七戶三十三萬四千九百三十二口七十二萬四千七百兵十一萬五千三十六

陳洪進所獻漳泉二州十二縣共管戶一十一萬二千三百三十一口三十一萬四千九百三十二兵一萬八千七百二十七

曹彬平李煜得州十九軍三縣一百八戶六十五萬五千六十五

太宗皇帝親征太原劉繼元得州十縣四十一戶三十萬五千三百二十

王全斌平孟昶得州四十五縣一百八十九戶五十三萬四千二十九

高繼冲所獻州三縣一十五戶一十四萬三千三百三十九  
潘美平劉鋹得州四十一縣六十五戶七萬五千一百三十九

李處耘慕容延釗平周保權得州十四縣五十八戶九

萬七千三百八十八

右八國共得州軍一百四十五縣五百七十五

隆平集卷十二

欽定四庫全書

隆平集卷十三

宋 曾鞏 撰

侍從

張昭字潛夫河間人舊名昭遠避漢祖諱故去其下字  
十歲誦書數十萬言及長經史罔不該洽仕後唐至中  
書舍人在周為兵部尚書建隆初遷吏部尚書未幾以  
本官致仕開寶末卒嶺南平太祖遣就家問獻俘之禮

昭卧疾口占皆有所據當時服其博記昭所修有後唐  
莊宗實錄及功臣列傳周祖實錄續唐愍帝漢隱帝實  
錄又撰漢六廟謚冊樂章在晉為翰林學士日常與呂  
琦崔稅集唐義寧終天祐末史成書二百卷

扈蒙字日用范陽人與從弟載皆以文學顯鄆杜間有  
道士魚又玄善知人常謂蒙曰君家兄弟當繼典誥命  
其後皆驗蒙仕周已居顯宋興亦入翰林為學士積官  
至工部尚書卒年九十二贈右僕射自張昭實儀卒朝

廷典故儀制皆蒙所裁定博洽長厚多笑雖侍上前亦不能自止

陶穀字秀實邠州人北齊尚書令唐邕唐內史侍郎唐儉皆其遠祖姓因避晉祖諱而更為陶遂不復其舊父渙唐末仕至刺史為邠州帥楊崇本所害穀隨母育崇本家幼有俊才漢相李崧竒之自單州判官擢為集賢校理未幾遂知制誥在周為翰林學士承旨宋興曆禮刑戶部三尚書卒年六十八贈右僕射宋之南郊法物

制度皆其所定博記美詞翰滑稽好大言佛老之書陰陽之學亦能詳究傾險巧詆為時論所薄其進緣李崧崧之及禍穀自謂有力馬周世宗召魚崇諒為學士未至穀譖以為顧望世宗遂令代其任世宗語趙上交多謁告穀乃及其受門生名園事而上交被黜若是者蓋不可徧錄

戚綸字仲言應天府楚丘人篤於古學喜談名教太平興國八年登進士第父同文字文約幼孤事祖母以孝

聞從邑人楊懿受經懿隱居不仕而以女弟妻同文遇疾因託以家事同文為葬其三世之未葬者遭世喪亂亦不復仕聚徒講學相繼登科者五十六人踐臺閣者亦至十數尚信義喜朋人急所與交皆當世之名士楊徽之因使至郡多所酬唱及卒徽之及其門人追號曰堅素先生長子曰維仕至戶部郎中綸其次子也大中祥符二年應天府言民有曹誠者即同文舊居廣舍百五十楹聚書千餘卷以延學者真宗嘉之賜名曰應天



府書院命綸之子奉禮郎舜賓主之補試為府助教綸與兄維友愛甚至真宗初置龍圖閣待制首以任綸久之進樞密直學士大中祥符初祥文薦降歌誦日興綸恐流俗託朝廷嘉瑞事詐為闕靈木石之異幻惑愚眾如少君樂大者上疏亟論上嘉納之出知杭州發運使胡則李溥惡其修潔相與捃撫徙揚徐青鄆州復為勸農使王遵誨李仲容所誣奏謂常訕朝廷降太常少卿分司卒年六十八

徐鉉字鼎臣廣陵人十歲能屬文與韓熙載齊名江東  
謂之韓徐仕李煜至吏部尚書歸朝屢遷至散騎常侍  
坐累貶邠州行軍司馬卒年七十六鉉恬淡無矯偽不  
喜釋氏而好神怪有以此獻者多遂其所請布衣蒯亮  
事夸誕年逾九十鉉延至門下稽神錄之事多亮之言  
也初自江南入使人報城陷太祖厲聲責之鉉對曰臣  
為江南大臣而其國滅亡此死有餘罪不必他問太祖  
歎曰忠臣也命坐賜予甚厚鉉至京師見披毛褐者輒

晒之邠州苦寒終不御毛褐冷氣致腹疾而卒李穆常使江南見鉉及其弟錯文章曰二陸不能及也錯死於江南鉉好李斯小篆尤得其妙隸書亦工尺牘為士大夫所得皆珍藏之有文集二十卷又有質論稽神錄行於世常受詔與句中正重定說文

楊徽之字仲猷建州蒲城人世尚武力父澄始業儒徽之少好學同邑有江文蔚善賦江為善詩皆延置客館未暮遂與齊名聞廬山學舍盛即往肄業周顯德中登

進士甲科建隆初監方城商稅因故人出使訪問謠俗  
微之為言海內寧一宜崇儒術以厚風教太祖疑以訕  
黜為天興令蜀平徙峨眉令太宗嗣位名還累擢至諫  
議大夫為張洎劉昌言所誣貶鎮安軍司馬真宗尹京  
驛名復舊官為開封府推官即位除工部侍郎兼祕書  
監遷樞密直學士翰林侍讀學士卒年八十無子一女  
適宋氏時外孫綬纔十歲特授太常寺太祝姪孫偃集  
皆同學究出身微之清素重名教尚風義常言溫仲舒

寇準以搏取貴位使後進趨競禮俗寢薄矣與石熙載李穆賈黃中為文義之友多識典故唐之士族人物悉能詳記尤工吟詠有集二十卷景祐二年詔以徽之先帝官僚特贈太子太師謚文莊

王禹偁字元之濟州鉅野人家世微賤九歲能為歌詩州從事畢士安見而異之勉其勤業及長善屬文太平興國八年登進士第太宗聞其名召試相府擢詞館獻端拱箴上深嘉納趙普尤器重之端拱二年廷試貢士

詔使作歌援筆立就太宗謂侍臣曰此歌不踰月徧天下矣以左司諫知制誥駕幸瓊林苑召至御榻前顧問語宰相曰禹偁文章獨步當世其將大遇如此因抗疏為徐鉉雪誣貶商州團練副使久之復知制誥召入翰林為學士孝章皇后崩梓宮遷主第禹偁語賓客后常母儀天下當用舊典坐訕謗罷職知滁州真宗即位遷刑部郎中召知制誥咸平初求補外守本官知黃州卒年四十八初境內有二虎鬪其一死而食其半又羣雞

夜鳴經月不止禹偁以其事聞上遣中貴人乘驛問勞  
且為襍醮詢日官云守土當其咎亟命遷蘄州力疾上  
道卒上聞訃嗟悼賜一子出身禹偁辭章敏瞻喜談世  
事臧否人物以正道自持故屢被擯斥所與游必儒雅稱  
獎後進如孫何丁謂遂名重一時有小畜集三十卷奏  
議十卷後集詩三卷

田錫字表聖其先京兆人唐末遠祖徙蜀因居嘉州楊  
徽之在峨眉宋白在玉津延譽之遂有聲稱太平興國

三年登進士第累擢諫議大夫史館修撰知制誥卒年六十四贈工部侍郎有咸平集五十卷錫好學至老不倦以畫規獻替為己任耿介寡合恭敬好禮上疏皆焚其稿趙普作相有司受羣臣章疏必先白而後敢進錫上書於普以為失至公之體真宗即位錫因對言舊有御覽但記分門事類不若以經史子集為御覽三百六十卷日覽一卷經歲而畢又取經史切要之言為御屏風十卷置御座側則治亂興亡之鑒常不忘矣上詔史



館借以羣書乃先上御覽三十卷御屏風五卷其序御  
屏風之略曰湯之盤銘曰德日新又日新太公之金匱  
云武王欲造起居之戒乃銘於几杖曰安無忘危存無  
忘亡熟惟二者後必無凶墨子云堯舜禹湯書其事於  
竹帛琢之盤盂曰君子福大而愈懼爵隆而益恭遠察  
近視俯仰有則軒堂輿几皆有銘焉曰吾居民之上惴  
惴恐不及武王戶席必有戒焉席之銘曰無行可悔戶  
之銘曰名難得而易失唐黃門侍郎趙智為高宗誦孝

經曰天子有諍臣七人雖無道不失其天下微臣敢以此言上獻憲宗採史漢三國以來經濟要事撰書十四篇曰前代君臣事迹書之六扇屏風置御座之右焉

邢昺字叔明濟陰人太平興國初舉九經廷試日召陞殿講易二卦又取其羣經發題太宗稱其精博擢上第累擢至右諫議大夫國子祭酒咸平二年初置翰林侍讀學士首以授昺積官至禮部尚書卒年七十九贈左僕射國朝舊制非宗室將相無省疾臨喪禮惟昺與郭

贛以恩舊上特臨問其疾為時之榮曷在東宮及內庭  
講孝經禮記者二論語十書十三易三詩左傳各一據  
經數釋仍多引時事為喻世為農家尤悉民事上訪民  
間疾苦必俚語為證以專經進強為詩人多傳笑之

孫何字漢公蔡州人幼嗜學為文必本經與丁謂同為  
王禹偁所題獎時謂之孫丁淳化三年舉進士殿試及  
省闈俱為第一累擢起居舍人知制誥卒年四十四性  
平急常任京西兩浙轉運使頗事苛察然獨喜稱譽後

進有文集四十卷子言弟僅

僅字鄰幾咸平初登進士第兄弟皆冠天下士學者榮  
之僅復舉賢良方正科入等累擢知制誥集賢院學士  
給事中卒年四十九僅端懿無競篤於儒學士大夫高  
其履尚有文集五十卷子和

路振字時發唐相巖四世孫巖貶死嶺外其子孫避地  
湖湘遂為永州人振幼穎悟十歲聽誦陰符經裁百言  
而止父使終業振曰百言演道足矣父異其對淳化中

舉進士殿試卮言日出賦獨振知所出而文亦典贍遂  
登甲科累擢知制誥詞命溫雅深愜物論卒年五十八  
振淳厚無臧否恂恂如也作詩有唐人風有文集二十

卷子綸

朱昂字舉之其先京兆人父祿光寓潭州遂家於衡山  
昂少好學有朱遵度者時謂之朱萬卷目昂曰小萬卷  
常游廬陵遇術士謂昂曰中原當有真主矣君仕可至  
四品遂北游江淮時周世宗南征韓令坤統兵揚州昂

謁令坤陳治亂方略令坤器之以權知永正縣有政績  
令坤遂表投本縣令改衡州錄事叅軍知州李昉見其  
文深加歎賞既又為薛居正所知二人遂薦引之太宗  
朝擢知水部郎中直祕閣真宗即位除知制誥入翰林  
為學士屢表乞骸骨敦諭彌確乃授工部侍郎致仕仍  
令俟秋涼南還故相張齊賢而下皆賦詩贈行詔從臣  
祖於東門南省試貢士遂以為詩題弟協仕至主客郎  
中雍王府翊善亦告老而歸時以比之二疏陳堯咨知

荆南表其居曰東西致政坊昂所得俸常以三之一購  
奇書於所居為二亭曰知止幽棲自稱曰退叟卒年八  
十二門人謚之曰靜裕先生詔錄其孫适同學究出身  
昂方正恬淡十五年為洗馬不遷非公事不至兩府有  
文集三十卷

宋白字素臣開封人十二善屬文建隆二年登進士第  
又舉拔萃科中高等釋褐授著作佐郎賜襲衣犀帶求  
補外授嘉州玉津令久之從太宗征太原劉繼元降白

獻平晉頌太宗獎諭還京遂除中書舍人賜金紫入翰林為學士至道初加承旨真宗即位擬陸贄謄子集以獻上察其意希大用遂命尹京無政事才不任劇乃自求罷以疾請老授兵部尚書致仕進吏部卒年七十七贈右僕射謚文安白之文頗事浮麗而理致或不工善諧謔不拘小節典貢舉得王禹偁田錫胡旦時謂之得人至他所取有納賂者伶人舉為戲言又高年不能決退多致譏諛然能贍濟親族而恤其孤幼是亦其所長也



杜鎬字文周世仕江南舉明經中選李煜任為集賢校  
理開寶末從煜歸朝太平興國初除崇文院檢討景德  
初置龍圖閣待制鎬與戚綸首預其選久之除閣學士  
積官至禮部侍郎卒年七十六子榘杞植椿初鎬應舉  
將就試有鼠啣孝經疏置榻前鎬怪之取以熟誦果試  
題出其中遂預選鎬博學善記問兄為法官有毀其父  
之畫像為近親所訟疑不能決鎬曰僧道毀天尊佛像  
似可比也兄從之衆服其審太宗將祀南郊彗星見趙

普以問鎬對曰當祭而日蝕猶廢祭况琴乎普以白禮  
遂寢太祖問西漢賜予多用黃金何近世不能也鎬曰  
當時佛事未興故耳真宗即位有司舉故事三月上巳  
金明池習水戲上以太宗忌月問鎬鎬據唐憲宗朝奏  
議禮有忌日無忌月遂從之景德初駕自澶淵凱旋遇  
忌日疑軍中鼓吹馳騎問鎬鎬對曰武王載木主伐紂  
前歌後舞可據也上凡得古器異書必詢之皆能究其  
本末令人檢閱必某事在某書幾紙幾行未嘗少差鎬

雖高年四鼓起誦春秋遲明且數卷日以為常

杞字偉長以鎬廕將作監主簿性豪邁遇事劇易奮然  
敢為慶曆四年廣西區希範誘白崖山酋豪蒙趕反自  
京西轉運使授杞刑部員外郎直集賢院為廣南西路  
轉運安撫使杞至宜州得州人吳香及獄囚區世宏往  
說諭之而勒兵攻破白崖黃泥丸居山等寨及其五峒  
斬首千餘級復環州焚其積聚蒙趕等大恐隨香出降  
獨希範走荔波峒杞曰蠻依險阻威不能制則恩不能

招所以數叛今特以窮蹙而降若咱以利後必復動乃  
犒以牛酒而六百餘人悉誅之後三日得希範醢以賜  
諸溪洞御史梅摯言杞殺降為國失信上置而不問  
止戒諭之徙兩浙路明年徙河北路項之擢天章閣待  
制知慶州蕃首孟香率千餘衆內附夏人以兵索香因  
劫邊戶掠馬牛有詔責杞還之杞言彼違誓舉兵香不  
可與因移檄夏人不償所掠則香亦不可得既而兵亦  
解去未幾杞卒杞博覽強記通陰陽術自推其數曰吾

年四十九死矣卒如其言有奏議十二卷子劾之將死一日據厠若見蒙恩區希範叱之曰若狂僭叛命於法當誅尚敢來訴邪

張詠字復之濮州人太平興國中登進士第累擢至樞密直學士御史中丞禮部尚書卒年七十贈右僕射詠為文尚氣不事雕飾自號乖崖公有文集十卷知杭州遇歲歉民私鬻鹽者輒寬之使獲安濟有與其姊壻訟家財者壻言婦翁疾篤子纔三歲遺書明言異日貨產

以十之三付子餘悉與壻詠曰汝婦翁智人也苟以七  
與子子死汝手矣知益州恩威並著其政令法度後人  
不能增損知昇州州數遭火詠廉知民之不逞者為之  
懲以峻罰其患遂息少學擊劍頗得其妙兼通術數好  
為大言喜事竒節常有士人游宦遠郡不能制其僕詠  
假以出郊趨深林斷其首而還詠卞急中歲苦腦瘍御  
下益峻不喜人拜有拜之則速拜不已或倨坐忿罵少  
以介潔稱晚節頗以營產侵刻失其故步

种放字明逸京兆人父卒於長安放纔七歲能屬文與其母隱於終南山豹林谷結茅為廬博通經史士大夫多從之學得束脩以養著蒙書十卷人多傳之淳化中詔起之其母恚曰常教汝勿講學今為人所知不復得安處我當棄汝入深山矣放遽辭疾不應召盡焚其筆硯轉居窮寂上亦不强致而命京兆府時存問之放常幅巾短褐攜琴酒坐盤石以自適豹林谷至州郭七十里徒步從樵夫往返不以為勞其學不喜釋氏常裂佛

書以製幃帳著嗣禹說表孟子上下篇善為歌詩自稱  
退士作退士傳又號雲溪醉叟咸平中母卒詔賜錢助  
其葬不受廬墓終制張齊賢蒞長安表其節行詔召放  
即起賜對便殿授右司諫直昭文館賜居第什器大官  
食翌日又賜緋魚遂謁告還山間來朝覲其後又居嵩  
少數遣使問勞賜予久之除起居舍人擢諫議大夫祀  
汾陰恩加工部侍郎一日召從學諸生飲曰與汝輩訣  
酒數行而卒終身不娶無子詔錄其姪世雍同學究出



身放在朝廷有所啓奏必據經義時無知者或譏其循  
默真宗乃以放議十三篇示輔臣曰放為朕言事甚衆  
但外廷不知耳其奏常焚彙故也上常欲大用之詔詢  
治道放固辭晚年日縱酒西祀頓盛飾輿服或以券直  
親詬驛吏頗貽譏誚放在京師王嗣宗除京兆守屢造  
放不為禮嗣宗怒語及其進取放曰不猶愈於角力而  
中第者乎嗣宗試藝講武殿日常程力以冠甲科故放  
及之嗣宗深銜其言及主京兆又間乘醉慢罵嗣宗嗣

宗因其弟姪強市田產興訟遣人詰責放又條上其不法事詔問狀會赦釋因別賜第嵩山命徙避嗣宗焉

楊億字大年建州浦城人祖文逸常夢一羽衣自稱懷玉山人覺而億生有毛被體其長盈尺踰月始墮能言母口授以孝經隨即記誦六歲學吟詩七歲善屬文太宗聞之詔江南轉運使李去華以所試文同送赴闕繼三日賜對面試詩賦五篇援筆立成時才十一歲上大嗟賞命內侍送至中書令賦詩一章宰臣等剡章稱賀

詔授祕書省正字有進修不已砥礪彌堅越景絕塵一  
日千里之句既謝即求歸鄉里喪父服除從祖徽之知  
許州往依焉徽之間與語歎其學問該博曰興吾門在  
汝矣淳化中詣闕獻文命讀書祕閣名試賜進士出身  
久之除直集賢院徽之在襄即幕下書疏一以委億及  
真宗即位累擢知制誥景德三年入翰林為學士母有  
疾謁告不俟報而行因以疾求解官授太常少卿分司  
疾愈知汝州會加玉皇聖號表請陪祠名為寶冊叅詳

儀制副使久之遷工部侍郎知貢舉坐譴降祕書監母  
喪詔起復工部侍郎翰林學士卒年四十七子紘給俸  
終喪景祐元年樞密使王晦叔上億天禧四年代寇準  
草奏請皇太子親政斥丁謂等姦邪事準既逐億亦憂  
畏而卒仁宗嘉歎下詔褒顯之特贈禮部尚書賜諡曰  
文有司舉故事非常任二府及事東宮賜四品無贈官  
上曰億為國竭忠有君子之大節可拘以常典乎億初  
為光祿寺丞太宗賞花後苑召命賦詩座側對輔臣誦

其警策句明年苑中曲宴億復獻詩上詔有司不時召對曰非貼職制不與立命除直院表求歸里中迎母特賜錢十五萬太宗知其貧故屢有霑賚時之公卿賤翰皆出其手在西掖有詔以吏部主事為大理評事億封還詔書同王欽若修冊府元龜詔書局衆論取決於億修太宗實錄八十卷億獨成五十六卷於歷代典章制度尤為該洽故朝廷議論必取正焉經傳子史百家之學罔不通貫為文敏贍起草細字一幅數千言不加點

竄對客談笑揮毫無滯論治道談世務必稽古驗今究  
切利病厚風義重名教誘進後學樂道人善賢士大夫  
翕然宗之然評品人物黑白大分姦邪之所疾惡讒毀  
因以聞母病不俟報而行皆以為慢朝廷又有以詆時  
政之語達於上上愛之有素而又且力為開釋故僅免  
焉在翰林常以疾告上遣使挾太醫診視表謝上批紙  
尾賜詩有副予前席待名賢之句其顧遇如此晚年留  
意釋典臨終有空頌一章其文有括蒼武夷潁陰韓城

退居汝陽蓬山冠蓋內外制刀筆集共一百九十四卷  
又別出西崑酬唱號郡文齋頽陰聯唱南陽釋苑等集  
又年錄時人所作為儒苑時文錄數千篇真宗常謂王  
回億詞學無比後學多所法則如劉筠宋綬晏殊而下  
比比相繼文章有正元元和風格自億始也旦曰後進  
皆師慕億惟李宗諤久與之遊終不能得其鱗甲蓋李  
昉詞體弱不宗尚經典故也

隆平集卷十三

欽定四庫全書

史部  
隆平集卷十四至  
十七

詳校官編修臣李潢

編修臣裴謙覆勛

總校官檢討臣何思鈞

校對官學正臣翁樹棠

騰錄監生臣沈維堂



欽定四庫全書

隆平集卷十四

宋 曾鞏 撰

侍從

樂黃目字公禮撫州宜黃人又史字子正母夢許真人  
令吞五色珠而生史史有文辭初仕江南歸朝再舉進  
士登甲科所至不修謹獲譴官至職方員外郎直史館  
卒有雜編六百九十餘卷自為文百卷謂之洞仙集黃

目淳化中登進士第深沉為吏以靜勝飾以文雅累擢知制誥給事中卒有文集五十卷雜編六十卷嘗與父史同在儒館人以為榮子理國定國

劉筠字子儀大名人咸平元年登進士第補館陶縣令代還詔揚億試選人校勘太清樓書籍筠中選第一累擢知制誥翰林學士嘗草丁謂李迪罷相制既又命筠草制復留謂筠不奉詔乃更命晏殊為之謂方用事筠遂請治郡以諫議大夫知廬州仁宗即位復翰林學士以疾除禮部侍郎

樞密直學士知棣州天聖五年復入翰林加承旨兼龍圖閣待制學士再知廬州乃營塚墓自為誌銘刻之卒年六十一子宗憲自景德以來居文翰之任惟筠與楊億齊名號為楊劉筠三典貢舉以策論升降天下自筠始其為人不苟合所著有七集

錢昆字裕之吳越國王侑之子隨俶歸朝諸從子皆授官獨昆及弟易願從科舉太宗嘉之淳化二年昆登進士第累官至諫議大夫以祕書監致仕卒年七十七子

孟孫孟荀孟回昆喜為詩賦又喜草隸書間自畫寒蘆沙鳥於紈扇有幽雅之趣人競藏之有文集十卷弟易字希白十七舉進士御試三題日未中而就言者指其輕俊而黜之太宗嘗語蘇易簡歎不與李白同時對曰有進士錢易能為歌詩不下李白上驚喜曰誠如是吾當白衣召至翰林會盜起劍南乃止咸平二年易登進士第甲科景德中舉賢良方正策入第四等累擢知制誥翰林學士卒年五十九易才俊過人為文數千言頃

刻而就又善行草書有金閨集六十卷瀛州集五十卷  
西垣集三十卷內制集二十卷壽雲總錄一百卷新書  
十卷子彥遠明逸彥遠字子高以父任太廟齋郎至大  
理寺丞登進士第至太常博士舉賢良方正策入等授  
祠部員外郎遷起居舍人直集賢院卒年三十七子勰  
燮蘇父易弟明逸及彥遠皆中制舉世以為盛彥遠屢  
上封事言事判司農寺因諸路奏大水彥遠言陰氣過  
盛在五行傳有下謀上之徵請嚴官省宿衛未幾有挾

刃理諺門者上善其奏特賜五品服

蘇紳字儀甫泉州人天禧中登進士第初名慶民避章獻太后諱改今名官太常博士舉賢良方正策入等授祠部員外郎屢上章仁宗嘉納之擢知制誥翰林學士諫官言紳舉進士馬端非其人改龍圖閣學士喪父服除復翰林學士言者又彈其急于進取改翰林侍讀學士知河陽徙河中府未行感疾醫者誤用藥猶力疾杖之卒年四十八子頌袞祝克

李行簡字易從同州人少苦學坐石誦六經常至夜分  
雖寒暑不渝又聚木葉學書筆法遒勁舉進士登第累  
擢至龍圖閣待制真宗數幸閣命講易因訪大臣能否  
行簡必稱其所長人以為長者仁宗即位進給事中  
以疾求外知河中府徙虢州卒年七十一有集二十卷子  
覲閱堯元峴行簡端重不妄交一介不取諸人雖善奕  
人莫知者諸子非冠帶莫敢見聚書萬卷多其自錄人  
謂之書樓偶夢綠衣吏持簿至公府自丁謂而下皆錄

其官壽至行簡云官議大夫及疾歎曰官給事中已踰分矣

馬亮字叔明其先茂陵人自祖韜始徙居廬州太平興國五年登進士第屢除外官咸平中王均反除西川轉運副使改使賊平召問蜀事加直史館復還部久之以右諫議大夫知廣州累遷至兵部侍郎仁宗即位進至工部尚書以太子太保致仕卒年七十三贈右僕射諡忠肅子仲宣仲容仲卿仲謀仲甫亮有治才所至以能稱



初置提點刑獄官亮領福建始訊寃獄全活者數十人  
知饒州有豪右白氏多持吏短長嘗殺人原赦益橫亮  
發其姦惡誅之部中肅然平王均主將誅戮不已亮救  
免者千數及械送誑誤者僅九十人至京知樞密院周  
瑩欲盡誅之亮言脅從者甚衆此特百之一二若不貸  
之恐益危懼貽朝廷憂從之任中執法請祖父未葬者  
不許析居以厚風教在蜀奏除廢井鹽逋二百餘萬真  
宗初政亮嘗上四事皆見施行其一言親王判開封府

地尊勢重疑隙易構非保全親之道皆取為切務其餘督給軍賞趣除逋負及通邊好亦皆仁政之一端

楊大雅字子政初名侃避真宗藩邸名而更之唐靖恭諸楊虞卿之後虞卿孫承休唐天佑初為吳越策禮副使因家錢塘大雅承休四世孫也端拱二年登進士第久歷外官後與陳從易並命為知制誥二人者皆博學有行義頗愜時論以右諫議大夫集賢院學士知亳州卒年六十九所著有大隱集三十卷西垣集五卷職林

二十卷兩漢博聞十二卷子潘泳漸沉淪

孫甫字之翰許州人天聖五年同學究出身八年再舉  
登進士第嘗從杜衍辟永興軍司錄衍在樞密府又薦  
之除祕閣校理累擢天章閣待制河北都轉運使留侍  
講卒年六十贈右諫議大夫子宣實寘著唐史書七十  
五卷文集七卷每言唐君臣行事以推見當時治亂若  
身履其間聞者釋然為正言嘗言張修媛寵姿恃恩用  
物之過上曰用物在省司吾恨不知耳保州兵變前有

告者大臣不時發之甫力言樞密使偕副當得罪指杜  
衍也邊將劉滬城水洛涇原帥尹洙以滬違節制將斬  
之大臣稍主洙議甫以謂水洛通秦渭為便滬不可罪  
由是罷洙而滬釋衍屢薦甫甫與洙素善不少假借之  
范仲淹知杭州多便宜行事甫為兩浙轉運使一切繩  
之以法

司馬池字和中陝州江夏人少好學推家財數十萬與  
其諸父景德二年登進士第多歷外官累擢三司副使

天章閣待制知杭州徙晉州卒年六十三子旦光池嘗  
奏名禮部將入試殿廷一日心動不能寐曰吾母素多  
疾能無恙否及至內門徘徊不能入蓋母亡為友人所  
匿也因語其友而友止告以聞有疾池遂號慟而歸盛  
度謫守光州池為光山令大內火詔諸州市竹木州期  
以三日畢輸池以土不產轉市鄰郡非三日可得度怒  
甚既而光山為諸邑先池於民有信而民不俟于懲督  
也曹利用嘗薦為羣牧判官池辭不就朝廷固授之其

後利用貶其黨畏罪多從而毀之獨池在朝明利用之  
枉朝廷卒不問除知諫院表懇免上謂宰相曰人皆嗜  
進池獨嗜退也加直史館知鳳翔有疑獄上讞大理輒  
復下掾屬惶懼池曰長史者政事所係乃獨承其罪詔  
責之政陽鎮巡檢夜飲富民家所部卒執之而俾為文  
約不敢復督士卒而後釋其縛池捕首惡誅之巡檢亦  
坐廢為侍御史知雜言陝西用兵無宿將劉平好自用  
必誤大事卒如其言在杭州為轉運使江鈞張從革摺

擬條奏之未謫間吏有盜官銀器為鈞償私費而從革之姻犯稅陰遣人私請或謂可以此報池獨不校

張師德字尚賢河南人父去華建隆二年舉進士第一師德大中祥符間復居第一時以為榮累擢知制誥諫議大夫知汝州卒年四十九子景仙景憲景思景惠師德孝謹有家法守道不回執政不悅在西掖者九年有集十卷

謝絳字希深太子賓客濟之子少以父任校書郎大中

祥符八年登進士第屢歷省寺館閣擢知制誥久之請  
補外知鄧州卒年四十六子景溫景平景回有文集五  
十卷絳初為祕閣校理常上疏謂有宋當以土德王天  
下下兩制議不從天聖初水旱蝗生河決上疏據洪範  
京房易傳陳災異之變指切時政上嘉納之又論唐室  
麗正史官之局並在大明華清宮內太宗肇脩三館更  
立祕閣於昇龍門左親飛白題額刻贊閣下景德中積  
書浸廣又益以內帑四庫二聖常數臨幸親加勞問迺



宿廣內者有不時之召人人力道術究藝文知天子尊禮而名臣高位由此選也往者延燔簡編略盡詔訪舊本是正疑文有司引兩省故事別創外館以從繕寫考校之便直舍卑喧太官衛尉供擬滋削陛下未嘗迂翠華降玉趾寂寥冊府不聞輿馬之音曠有日矣議者以為慕道不篤于古待士少損于前士無延訪之勤而不自激策文雅漸弊甚為聖朝惜也願闕內館以恢景德之制從之又言號令數變則虧體利害偏聽則惑聰請者務

於必行守者患於不一願罷內降凡詔令皆由中書密院然後施行因進聖治箴曰紹聖馭臣內戒慎令警變凡五篇

李仲容字儀父濟陰人唐郇王禕十三世孫祖濤國初為兵部尚書仲容少好學咸平五年登進士第累擢知制誥時翰林學士員不足衆謂當次補而不為宰相所喜乃罷知制誥為給事中集賢院學士久之除翰林侍讀學士兼龍圖閣學士官至戶部侍郎卒年七十子景

倫景賢景行景仁集制草為冠鳳集十二卷仲容性質醇易喜讀書善記問賓至多命酒笑談而不及勢利

馮元字道宗三世為偽漢日官父邴從劉鋹入朝為保章正元少好學崔頤正孫真授以五經大義祥符中登進士第會詔擇明經補學官自陳通五經謝泌領銓筦詰之曰古者治一經或至皓首子能盡通之耶對曰達者一以貫之泌善其對因問以疑義隨輒辨析遂以為國子監講書仁宗陞儲擢太子右諭德即位除龍圖閣

直學士兼侍講又判國子監故事國子監必宿儒典領其後頗用貴遊子弟委任與堯庫均及元與孫奭並命興議大服未幾為龍圖閣學士翰林學士護葬章懿太后於洪福院及葬永定陵發壙中有水罷為龍圖閣學士知河陽宰相王曾言元東朝舊臣不宜以細故棄外即名為翰林侍讀學士遷戶部侍郎卒年六十三贈尚書謚章靖無子以兄之子諱為後真宗大中祥符末元常講易泰卦賜五品服除直龍圖閣直閣名官蓋始於

此元性簡重非慶弔未嘗通謁公卿執親喪自括髮至  
祥練皆按禮變服多識今臺閣品式之事所學長於易  
常患先儒多失揚雄太玄之旨獨唐王淮為稍近為釋  
文一篇欲因王說補正之卒不能就也

孔道輔字原魯初名延魯孔子四十五世孫大中祥符  
五年登進士第天聖間擢至龍圖閣待制除諫議大夫  
御史中丞出知泰州徙徐兗州進給事中龍圖閣直學  
士復為中丞坐鞫馮士元獄以給事中知鄆州未至卒

子宗亮宗翰初道輔任左正言嘗言樞密使曹利用御  
藥羅崇勳皆竊弄天子威柄中外憚之不早斥去無以  
清朝廷使契丹北主酌以大卮曰方天寒飲此可以致  
和氣道輔曰不和固無害及還言者以為開夷爭端他  
日上問之對曰契丹新為黑水所破勢甚感平時漢使  
至多以言相侮若不答恐益慢中國上然之在憲府會  
郭皇后廢率諫官御史伏閣請對上令至中書宰相謂  
曰廢后有漢唐故事道輔曰大臣當導君以堯舜而漢

唐失德可為法耶宰相色沮明日請對不得入遂有秦  
州之命後雖坐馮士元事貶天下莫不以直道許之也  
段少連字希逸開封人其母夢鳳集於家庭而少連生  
大中祥符末舉服勤詞學科中選釋褐知鄂州崇陽縣  
崇陽劇邑自張詠後未之繼者少連治譽仍出其右累  
擢至天章閣待制范仲淹薦可任將帥除龍圖閣直學  
士知涇州徙渭州卒年四十六子仲堅初郭皇后廢少  
連為殿中侍御史與臺諫官伏閣不得對孔道輔范仲

淹謫出少連等止各罰銅十斤少連上疏以為道輔仲淹出守外郡中外皆謂非陛下之意特宰執假天威以斷來者之說不報又疏伏覲戒諭自今並如故事密上封章不得羣詣殿門請對且伏閣上疏豈非故事昔唐陽城王仲舒伏閣雪陸贄之枉崔元亮叩殿陸理宋申錫之寃今陛下未忍廢黜皇后而兩府列狀議降為妃諫議御史敢廢伏閣之事乎陛下深惟道輔等所言為忠亮乎為阿黨乎不報又上疏去年十二月二府大臣



晚出民間喧傳皇后被遣而入道矣又傳降為妃而離  
宮矣在外莫知其過失無不驚歎且皇后有罪黜則告  
宗廟廢則為庶人安有陰行臣下之議者乎且皇后有  
小過可降為妃則臣僚之婦有小過亦當廢為妾矣臣  
等赴中書時輔弼之臣備言皇后有妬忌之行始議入  
道終降為妃兼云有上封者恐皇后不利於聖躬故修  
築高垣置在別館臣等備陳中外之議翌日詔出乃云  
中宮有過掖廷具知特示含容俾自修省供給之間一

切如故臣未審黜在別館為妃乎為后乎詔書不言安  
所取信皇后動搖有大不可者二輔弼之臣獨不念之  
內外臣僚以至戚里豈不萌覬覦之心欲進其人以希  
選納不憚巧事寵愛以結內援使陛下惑女色而亂紀  
綱紀綱之亂變故以生社稷可得安乎臣願詔皇后歸  
宮復位號杜絕非間待之如初陛下苟為邪人所沮不  
加省察臣恐高宗皇后之枉必見於他日宮闈不正之  
亂未測於將來不報

葉清臣字道卿蘇州人天聖二年登進士甲科累擢知制誥龍圖閣直學士權三司使出知江寧府入翰林為學士丁父憂或言其知兵起復守邊宰相陳執中所不悅除翰林侍讀學士知邠州改青州永興軍復為翰林學士權三司使罷知河陽卒年五十贈諫議大夫子均圻垣增有文集一百六十卷清臣初在西掖方陝西用兵急於經費中書進擬三司使獨不在選中上自選任焉及再蒞是職請上河北安撫司錢平糴安撫使賈昌朝

固爭而罷其為人爽邁遇事敢言數言事皆當世可施用者在三司始奏編前後詔敕使吏不能欺簿帳之冗者一切刪去內東門御廚凡所呼索省司不敢問此內臣領之故也自是始為合同以檢其出入焉常為兩浙轉運副使疏太湖盤龍滙滬瀆港入於海民賴其利

彭乘字利建益州華陽人大中祥符五年登進士第授漢陽軍判官與同年生避相國寺門顧望皆有從宦之樂乘獨曰親老矣敢舍晨昏之奉乎翌日遂乞侍養以

歸久之有薦其文行者召試除館閣校勘固辭還家天禧初用寇準薦復召試為校勘遷秘書丞集賢校理懇求便親得知普州舊制蜀人不許赴蜀官特恩自乘始父卒既葬甘露降墓柏上人以為孝感起居注闕中書擬人乘在選中仁宗指其名曰此老儒雅有恬退稱遂用之擢知制誥翰林學士羣牧使卒年六十五子果行景行家聚書萬卷多乘手自校正質重純孝特為文少

工

王洙字源叔應天府人天聖二年登進士第累擢知制誥翰林學士以兄子堯臣叅知政事權翰林侍讀學士卒年六十子力臣欽臣陟臣曾臣所著傳十卷雜文十有餘篇洙博覽強記學問過人圖緯方技陰陽五行筭數音律詁訓篆隸之學無所不通兩為天章閣侍講常與胡瑗定樂制更造鐘磬而無形制容受之別既成卒不可用預修崇文總目集韻祖宗故事五朝武經聖略鄉兵制度在太常主溫成葬事由員外除翰林學士及

避親以一學士權二學士故事侍講無兼領者嘗為諫官范鎮論奏之其卒賜諡曰文吳中復等言官不應得諡乃止

胥偃字安道潭州長沙人大中祥符五年登進士第屢歷外官景祐初知制誥久之入翰林為學士權知開封府卒年五十七子元衡其家初有田數十頃偃既貴遂以予族人西邊用兵士卒親屬留京師有犯法抵死者上不忍使就刑言者或欲置毒飲中令得善死偃力諫

止天下圭田初無月日之限爭者稍衆偃請限水田以  
四月終陸田以三月終因著為令常與謝絳試中書吏  
大臣有私屬者偃不發視其緘牘而焚之曰發而言之  
不亦傷刻薄乎

狄棐字輔之潭州湘潭人唐梁公十代孫也唐末其遠  
祖避地因家焉咸平二年登進士第多歷外任明道初  
擢至諫議大夫龍圖閣直學士進樞密直學士卒年六十  
七子遵道遵度遵禮遵路常守蒲中內臣旁午有自矜



權寵者欲引援之裴答以他語退謂人曰吾湘潭一寒士今官侍從豈晚節緣近倖以希進哉知廣州不畜南海物人稱其廉慎及終家無餘貲

吳遵路字安道父倬字正儀潤州人幼有俊才韓熙載潘佑皆以文章著名江左一見倬深加器重曰吳安道中林之蘭蕙也因問以文皇杜淹論樂異同倬曰志氣未動則聲能致和哀樂既形則樂乃思變熙載佑歎曰足以探禮樂之情矣應江南進士舉徐鉉主文擢在高

第補丹陽尉久之進內史歸朝以近臣薦始得對名試  
學士院充史館編修太平御覽文苑英華太平廣記遷  
祕閣校理修起居注太宗寶錄官至職方員外郎卒年  
五十六有文集二十卷說文及祕閣閒談各五卷江淮  
異人錄各三卷遵路大中祥符五年登進士第累擢至  
天章閣待制龍圖閣直學士卒年五十六子瑛遵路少  
穎悟其舅陳彭年以令器許之及長博學慎重寡言尤  
篤於風義居母喪廬墓側蔬食終制嘗採古今治亂事

著皇典數百卷未訖而終家無餘貲友人范仲淹分俸  
賙之

周湛字文淵其先汝陰人五世祖宦湖外馬霸圖割據  
留不敢歸子孫遂為邵州人既又徙居南陽湛天禧二  
年登進士第歷內外官善治劇初若不留意已而皆得  
其要累擢至右諫議大夫知相州卒年七十一子璟玘  
戎州俗不服藥而救疾以巫湛為通判刻方書於石民  
始知藥之驗江湖民多略良人鬻嶺外為奴婢湛提點

廣東路刑獄許其自陳得還鄉者千數徙京西路罷鄧州美陽堰役夫歲數十萬前此利止及圭田而不及民故也江西民喜訟多竊去案牘而州縣不能制湛為轉運使為立十文架閣法以歲月為次嚴其遺失之罪朝廷頒諸路為法至今不易又命諸縣據籍括詭名戶一路推究三十餘萬以免追擾之弊徙夔州路蠲雲安鹽井虛課而省其輸薪之患知襄州鄜中皆以竹居民多侵官衢故多火災湛命驗券而正其經界仍易竹以瓦

後不能改任三司鹽鐵判官立勘同法歲減天下計帳  
七十道遷戶部副使覆校軍大將功罪發運司保送而  
遷者減常之半善隔屋射弩發必中的人服其妙

楊察字隱甫其先成都人景祐元年登進士甲科累擢  
知制誥龍圖閣待制翰林學士加承旨三入翰林又常  
兼龍圖學士權知開封府御史中丞兩除三司使卒年  
四十六贈禮部尚書諡宣懿無子以兄之子登為後察  
七歲始能言為文敏瞻典內外制有體要更術簡而中

理初為江東轉運使部吏頗易其年少及摘姦伏一路  
懍懍任中執法言臺屬供奉殿中巡糾不法必得通古  
今治亂良直之臣今舉格太密公坐細故皆所不取恐  
英偉之士或有所遺知成都餽鍾乳數片癰發內潰而  
逝有文集二十卷弟寘字審賢慶曆二年登進士殿省  
國學皆選居第一通判潤州以母憂不赴毀瘠嘔血而  
卒年三十一寘嘗曰友人黃孝先嘗夢我為龍首山人  
蓋逆知其無祿也

余靖字安道韶州人天聖二年登進士第又中書判拔  
舉科授將作監丞稍遷祕書丞集賢校理范仲淹言事  
忤宰相貶饒州靖上言恐鉗天下口落職筠州管權以  
母憂服除復職除右正言數言事合上意擢知制誥積  
官至工部尚書卒謚襄靖常三使郭丹曉其語言因為  
蕃部語詩為御史劾奏貶吉州茹孝標嘗因靖言其不  
孝廢至是遂詣闕言靖少嘗犯法靖乃自求侍養改將  
作少監分司居韶州六年起知虔州喪父解官會儂智

高反朝廷以祕書監起復知潭州徙桂州聞智高自廣  
還邕靖意其必援交趾而脅諸峒以自固乃檄諭李德  
政及溪峒諸酋約其破賊會遣狄青孫沔將兵且至與  
靖合為三將靖嘗迫鈴轄陳曙出關敗走青次賓州戮  
曙以狗靖懼離席拜青及青破賊靖與有功後知廣州代  
還至江寧府秦淮亭卒年六十五靖嘗夢人告以官及  
死所皆驗

賈黯字直孺南陽人慶曆六年登進士第累擢知制誥



翰林學士權御史中丞在翰林兩為學士兩以待讀學士出補郡卒年四十四黠有學少文修潔無所阿附仁宗深重之嘗知襄州父疾請解官就養未報乃棄官而歸責郢州未赴而父卒服除亦不復責權開封府府史額七百人廢而復叙者皆額外補之黠請叙者須有闕乃補在西掖宰相以錢延年為待制黠不草制故罷居憲府與兩制合議請以漢王為皇伯宰執不從會大雨水黠上疏言水不潤下以二三大臣阿諛容悅違背經

義故致此災變黜言事雖不皆切中然時論稱其亮直  
何中立字公南許州人景祐元年登進士第多歷內外  
官擢修起居注知制誥龍圖閣直學士樞密直學士知  
杭州卒年五十四子景先景初景山景閏景倣景甫景  
倩中立嗜酒而為文頗正所至政事亦優權知開封府  
以賊屬吏不服釋去中立至有復執所釋囚來中立視  
之曰此真盜也窮治之果不能隱知慶州有卒告大校  
受贓者中立治告者誣而置於法或曰貸姦可乎曰人

人得持短長以制其上將誰使督戰於行陣也

陳從易字簡夫泉州人端拱初登進士第踐歷之久始擢知制誥諫議大夫進龍圖閣直學士知杭州卒年六十子紹孫繼孫維孫所著泉山集二十卷中書制稿五卷西清奏議二卷嘗與楊大雅同在西掖俱以文學知名時謂之楊陳從易天禧中坐失舉送宰相寇準素惡之遂除知吉州及準貶道州從易為湖南轉運使或謂曰可忘廬陵之命耶準至從易以故相禮敬之言者為

慙素與王欽若善欽若廢居睢陽親舊畏時相無敢見者從易赴河南見之欽若曰無乃為君累乎卒留數日而行

隆平集卷十四